

- 5 Scire quidem non prima negant, non ultima donant
 Tempora, sed sensus promptus et arte potens.
 Ecce puer scribit, bene vel male nescio: si sic
 Vel si sic recitet, incipit esse suum.
 Dum varios trutino mores, duplicis mihi vitae
- 10 Semita per speculum misteriale patet.
 Hanc typice speciosa Rachel, Lia lippa figurant,
 Et Lia succumbit inferiorque gemit.
 Non sic conveniunt, simili nec munere certant,
 Nec sic respondent haec duo lance pari.
- 15 Non hiis assimilat alterna relatio vultus:
 Haec oculis lippit, purius illa videt.
 Lux male destituit lippam, scintilla Rachelem
 Luce sui penetrat interiore poli.
 Oblectant terrena Liam, divina Rachelem:
- 20 Despicit illa solum, suspicit illa deum.
 Ista sapit terram res terrea, carnea carnem,
 Fex fecem, fedum feda, limosa limum.
 Illa sapit celum res celica, summaque summum,
 Lux lucem, mundum munda, beata bonum.
- 25 Hinc pax, inde labor; amor hinc, ibi rixa perhennis;
 Hinc lis, hinc requies; hinc dolor, inde decus.
 Hanc animi virtus incendit, gloria tollit,
 Spes reficit, pietas recreat, ardor agit.
 Hanc mens destituit, dolor impugnat, timor angit,
- 30 Noxa gravat, pugnant crimina, pena premit.
 Sollicitat labor hinc Martham, mens inde Mariam;
 Sudat Martha querens, fletque Maria sedens.
 Martha sibi bene discurrit, melius soror audit:
 Sane Martha facit, sanius illa videt.
- 35 Haec citra pugnae meritum subcumbere nescit,
 Haec medio languens calle jacere solet.
 In bivium sic dividitur dupla secta sororum:
 Utraque fautores gaudet habere suos.
 Hinc mihi plebs numerosa patet vulgusque laboris:
- 40 Hinc celebres video relligione viros.
 Instituit decreta suis moresque monetat
 Vir vicium reprobans atque probanda probans.
 Vir benedictus hic est, vir felix, factus ad unguem,
 Exsequiturque sui nominis ille notam:
- 45 Divinis manibus vas excisum Benedictus
 Nomine, nec nomen re minus illud habet.
 In quo fulserunt mitis devotio, morum
 Regula, virtutum forma, lucerna boni.
 Se reliquis velud exemplum vitaeque sigillum